



Sud Bosne i Hercegovine
Sud Bosne i Hecegovine

Broj: S1 3 Iž 043522 22 Iž
Sarajevo, 11.08.2022. godine

Sud Bosne i Hercegovine, u vijeću Apelacionog odijeljenja sastavljenom od sudija Zvezdane Antonović, kao predsjednika vijeća, Dinke Bešlagić-Čovrk i Mirka Božovića, kao članova vijeća, odlučujući o žalbi Admira Denića, ..., N., izjavljenoj protiv Odluke Centralne izborne komisije Bosne i Hercegovine broj: 06-1-07-1-608-3/22 od 04.08.2022. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Opće izbore 2022.godine, u nejavnoj sjednici, održanoj dana 11.08.2022. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine po podnesenim prijavama do 19.07.2022.godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što uz prijavu nije dostavljen validan dokaz o identitetu.

Žalitelj je protiv navedene odluke blagovremeno izjavio navodeći da je njegova prijava za glasanje izvan Bosne i Hercegovine odbijena jer dokaz o identitetu nije kompletiran, te u prilogu dostavlja kopiju identifikacionog dokumenta. Moli da se njegova žalba uvaži i da mu se omogući učestvovanje na izborima.

Centralna izborna komisija Bosne i Hercegovine u odgovoru na žalbu predlaže da se žalba odbije kao neosnovana.

Žalba nije osnovana.

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave za glasanje

izvan BiH dostavljene dana 13.06.2022. godine, pravilno uočila da podnositelj prijave nije dostavio validan dokaz o identitetu. Naime, žalitelj uz prijavu dostavio skenirane obje strane lične karte izdate u BiH, ali kojoj je istekao rok važenja sa danom 26.07.2020. godine, pa ista nije validan identifikacioni dokument, zbog čega Centralna izborna komisija BiH opravdano nije bila u mogućnosti da utvrdi sve potrebne činjenice za registraciju birača za glasanje putem pošte. Navedeno je u skladu s članom 9. Upustva o postupku slanja, prijema, obrade, arhiviranja i zaštite elektronskih prijava državaljana Bosne i Hercegovine za glasanje izvan BiH elektronskim putem („Sl. glasnik BiH“, broj 27/22) kojim je propisano da vjerodostojan dokaz o identitetu za birača koji privremeno boravi izvan BiH, a u vezi sa članom 3.15 Izbornog zakona BiH („Sl.glasnik BiH“, broj 23/01 do 51/22), predstavlja fotografisan, skeniran ili u drugom elektronskom obliku snimljen jedan od tri važeća identifikaciona dokumenta Bosne i Hercegovine.

Odredba člana 3.15 stav (1) Izbornog zakona BiH propisuje da državljanin BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnositelj prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

Takođe, nakon obrade prijave žalitelj je putem e-maila obaviješten da njegova prijava za glasanje izvan BiH sadrži nedostatke. Nevedene nedostatke žalitelj nije otklonio u predviđenom roku od dva dana.

Napomene radi, žalitelju nije oduzeto biračko pravo za Opće izbore 2022. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A**

Zvezdana Antonović